

**KERATAN AKHBAR-AKHBAR TEMPATAN
TARIKH: 5 DISEMBER 2014 (JUMAAT)**


Bil	Tajuk	Akhbar
1	Tetamu kehormat MAHA 2014	Utusan Malaysia
2	Kurangkan aktiviti pantai, laut dijangka bergelora	Sinar Harian
3	Amaran angin kencang, laut bergelora di perairan sabah dan Labuan	Bernamea.com
4	Mahkamah Persekutuan sedang siapkan penghakiman kes Anwar – Ketua Hakim Negara	Bernamea.com

KERATAN AKHBAR
UTUSAN MALAYSIA (KELUARAN KHAS) : MUKA SURAT 16
TARIKH : 5 DISEMBER 2014 (JUMAAT)



PERDANA Menteri, Datuk Seri Najib Tun Razak bersama-sama isteri, Datin Seri Rosmah Mansor beramah mesra dengan kanak-kanak selepas menyempurnakan Majlis Perasmian MAHA & HPPNK 2014 di MAEPS, Serdang.

Tetamu kehormat MAHA 2014



KETUA Setiausaha Kementerian Sains, Teknologi dan Inovasi, Datuk Seri Dr. Noorul Ainur Mohd. Nur (tiga dari kanan) menunjukkan kaedah penggunaan Green Roof yang terdapat pada satu sudut di dewan MAHA 2014.

1. KETIBAAN Timbalan Perdana Menteri, Tan Sri Muhyiddin Yassin disambut oleh kakitangan Kementerian Pertanian dan Industri Asas Tani (MOA) sebelum beliau menyempurnakan Majlis Penutup MAHA 2014 di MAEPS, Serdang baru-baru ini.
2. MENTERI Pertanian dan Industri Asas Tani, Datuk Seri Ismail Sabri Yaakob memberi aiskrim perasa nanas kepada seorang pengunjung di Laman Nanas sewaktu berkunjung ke tempat itu.
3. MANTAN Perdana Menteri, Tun Abdullah Ahmad Badawi dan isteri Tun Jeanne Abdullah teruja melihat sesuatu yang dipamerkan kepada mereka pada MAHA 2014.
4. TIMBALAN Menteri Pertanian dan Industri Asas Tani, Datuk Seri Tajuddin Abdul Rahman menumpukan perhatian kepada barang-barang yang dipamerkan pada MAHA 2014.
5. MENTERI Pembangunan Wanita, Keluarga dan Masyarakat, Datuk Seri Rohani Karim (kanan) terpesona dengan kecantikan tumbuh-tumbuhan yang menggunakan konsep pertanian bandar.
6. KETUA Setiausaha Kementerian Pertanian dan Industri Asas Tani, Datuk Arif Abd. Rahman ketika melancarkan mesin memproses makanan haiwan ternakan.
7. MENTERI Besar Johor, Datuk Seri Khaled Nordin (berkaca mata hitam) turut melapangkan masa untuk mengunjungi MAHA 2014.
8. MENTERI Besar Perak, Datuk Seri Dr. Zambry Abd. Kadir (tiga dari kanan) mendengar penerangan daripada seorang pempamer yang menyertai MAHA 2014.
9. AHLI Parlimen Kinabatangan, Datuk Bung Moktar Radin ketika berkunjung ke pameran haiwan ternakan.

Kurangkan aktiviti pantai, laut dijangka bergelora

SHAHALAM- Orang ramai dinasihatkan mengurangkan aktiviti di kawasan pantai berikutan keadaan laut bergelora dan hujan berserta ribut petir bermula hari ini.

Pengarah - Khidmat Korporat dan Komersial Jabatan Meteorologi, Dr Mohd Hisham Mohd Anip berkata, walaupun hujan di kawasan pantai barat tidak begitu banyak berbanding sebelah timur, orang ramai masih perlu berhati-hati berkemungkinan kenaikan paras air sungai dan banjir kilat akan berlaku.

"Cuaca masih lembap dan dijangkakan kawasan pantai barat seperti Selangor, Perak dan Johor akan berlaku hujan pada sebelah petang berserta ribut petir.

"Cuaca pada sebelah pagi diramal baik, bagaimanapun kita minta orang ramai mengurangkan aktiviti berhampiran pantai kerana keadaan laut yang sedikit bergelora," katanya kepada *Sinar Harian*, semalam.

Beliau berkata, bermula Isnin, kawasan pantai timur akan berlaku hujan lebat berterusan, manakala kawasan di Sabah dan

Sarawak turut mengalami hujan monsun.

Sementara itu, Penolong Pengarah Operasi Jabatan Bomba Dan Penyelamat Selangor, Mohd Sani Harul berkata, pihaknya sudah membuat persiapan dari segi kelengkapan alat dan kesediaan anggota untuk menghadapi kemungkinan berlaku banjir.

Beliau berkata, orang ramai khususnya yang tinggal berhampiran sungai dan longkang besar, dinasihatkan berhati-hati serta mengawasi anak-anak kecil mereka bagi mengelakkan kejadian tidak diingini.

"Awasi paras air sungai dan longkang. Jangan bermain di kawasan berhampiran," katanya.

Menurutnya, setakat ini, belum ada sebarang kemalangan jiwa dilaporkan berkaitan banjir di negeri ini.

Katanya, bagaimanapun masyarakat setempat perlu peka dan bertindak menyelamatkan diri jika siren kecemasan berbunyi.

"Warga emas, kanak-kanak, OKU dan orang yang sakit perlu diutamakan dalam operasi menyelamatkan," katanya.



Amaran Angin Kencang, Laut Bergelora Di Perairan Sabah Dan Labuan

KUALA LUMPUR, 4 Dis (Bernama) -- Amaran angin kencang dan laut bergelora kategori pertama dijangka berterusan di perairan Sabah dan Wilayah Persekutuan Labuan sehingga Selasa depan (9 Dis).

Menurut kenyataan [Jabatan Meteorologi Malaysia](#) hari ini, keadaan sama diramal berlaku di kawasan perairan Condore, Reef North, Layang-layang, Palawan, Sulu dan Sulawesi, dalam tempoh yang sama.

Angin kencang timur laut berkelajuan antara 40 dan 50 kilometer sejam dengan ketinggian ombak sehingga 3.5 meter di kawasan itu berbahaya kepada bot kecil, aktiviti rekreasi dan sukan laut.

-- BERNAMA



Mahkamah Persekutuan Sedang Siapkan Penghakiman Kes Anwar - Ketua Hakim Negara

Oleh Suriati Sidek Ahmad

KUALA LUMPUR, 4 Dis (Bernama) -- Mahkamah Persekutuan sedang menyiapkan penghakiman berhubung rayuan terakhir Penasihat PKR Datuk Seri Anwar Ibrahim untuk mengetepikan hukuman penjara lima tahun atas sabitan meliwat bekas pembantunya Mohd Saiful Bukhari Azlan, enam tahun lepas.

Ketua Hakim Negara Tun Arifin Zakaria ketika dihubungi Bernama hari ini berkata beliau tidak dapat memberikan tarikh tepat kerana panel hakim masih menyiapkan penghakiman mereka.

"Saya tidak boleh memberitahu tarikh sebenar sehingga kami (hakim-hakim) melengkapkan penghakiman. Kami masih membaca penghujahan, biarlah kami membaca terlebih dahulu sebelum menulis penghakiman. Berilah kami ruang untuk menyediakannya," katanya ketika ditanya mengenai tarikh pengumuman keputusan kes rayuan Anwar oleh Mahkamah Persekutuan.

Arifin, yang mempengerusikan panel lima hakim dalam kes rayuan itu berkata, seseorang hakim diberi tempoh yang munasabah untuk menyelesaikan penghakiman kerana setiap kes adalah berbeza.

Empat lagi hakim ialah Presiden Mahkamah Rayuan Tan Sri Md Raus Sharif dan tiga Hakim Mahkamah Persekutuan, Tan Sri Abdull Hamid Embong, Tan Sri Suriyadi Halim Omar dan Datuk Ramly Ali.

Arifin menjelaskan, amalan standard bagi Mahkamah Rayuan dan Mahkamah Persekutuan untuk menyiapkan penghakiman mereka ialah dalam tempoh tiga bulan selepas kes itu didengar.

"Tetapi dalam kes-kes tertentu, mahkamah (Mahkamah Rayuan dan Mahkamah Persekutuan) akan mengambil masa lebih lama, mungkin sehingga enam bulan untuk menyiapkan penghakiman. Ia bergantung kepada kerumitan kes itu," katanya.

Pada 7 Nov, Mahkamah Persekutuan menangguhkan penghakiman berhubung rayuan kes itu selepas mendengar hujahan peguam Anwar, Datuk Seri Gopal Sri Ram, bekas Hakim Mahkamah Persekutuan yang mengetuai pasukan 15 peguam termasuk tiga anak mendiang Karpal Singh, Ramkarpal Singh Deo, Sangeet Kaur Deo dan Gobind Singh Deo serta peguam kanan Tan Sri Muhammad Shafee Abdullah, yang mengetuai pasukan pendakwa.

Pendengaran rayuan itu yang pada awalnya ditetapkan dua hari mulai 28 Okt telah berlarutan selama lapan hari berikutan pihak pembelaan dan pendakwa menyampaikan hujahan panjang lebar dan mengemukakan banyak rujukan kes undang-undang dalam rayuan itu.

Mahkamah Persekutuan yang merupakan mahkamah tertinggi di negara ini, akan membuat keputusan sama ada membenarkan atau menolak rayuan Anwar bagi mengetepikan sabitan dan hukuman penjara yang diputuskan Mahkamah Rayuan pada 7 Mac lepas, selepas ia membatalkan keputusan Mahkamah Tinggi untuk membebaskannya.

Sekiranya Anwar gagal dalam rayuannya, beliau akan hilang kelayakan sebagai anggota Parlimen (MP) kawasan Permatang Pauh berikutan Perkara 48 (1) (e) Perlembagaan Kerajaan Persekutuan menetapkan seseorang MP lucut kelayakan sekiranya dijatuhi hukuman penjara lebih setahun atau denda lebih RM2,000.

Pihak pendakwaan juga telah memfailkan rayuan balas untuk menambah tempoh hukuman penjara.

Bagaimanapun rayuan itu hanya akan didengar jika Mahkamah Persekutuan mengekalkan keputusan Mahkamah Rayuan.

Mahkamah Rayuan mendapati Anwar, 67, bersalah meliwat Mohd Saiful, 27, di Unit 11-5-1, Kondominium Desa Damansara, Jalan Setiakasih, Bukit Damansara di sini antara 3.10 petang dan 4.30 petang, 26 Jun 2008.

Tuduhan mengikut Seksyen 377B Kanun Keseksan itu memperuntukkan hukuman penjara sehingga 20 tahun dan sebatan, jika sabit kesalahan.

Pada 9 Jan 2012, Mahkamah Tinggi membebaskan dan melepaskan Anwar daripada pertuduhan meliwat Mohd Saiful dengan alasan mahkamah tidak pasti 100 peratus tentang integriti sampel yang diambil untuk ujian DNA daripada individu yang didakwa menjadi mangsa.

Mahkamah memutuskan bahawa sampel berkenaan mungkin telah diusik sebelum sampai ke [Jabatan Kimia](#) untuk analisis.

Bagaimanapun, ketika mensabitkan Anwar dengan kesalahan meliwat itu, Mahkamah Rayuan berpendapat hakim perbicaraan terkhilaf dalam dapatannya tentang sampel berkenaan, yang didasarkan kepada keterangan dua saksi pakar yang dipanggil pihak pembelaan.

Ini kes liwat kedua melibatkan Anwar. Dalam kes pertama, beliau didapati bersalah meliwat pemandu keluarganya Azizan Abu Bakar di Tivoli Villa di sini pada 1994, dan dihukum sembilan tahun penjara oleh Mahkamah Tinggi pada 8 Ogos 2000.

Mahkamah Tinggi memerintahkan Anwar menjalani hukuman itu selepas beliau selesai menjalani hukuman penjara enam tahun kerana kesalahan rasuah. Beliau didapati bersalah terhadap empat tuduhan rasuah pada 4 April 1999.

Bagaimanapun, setelah merengkok selama hampir enam tahun di penjara kerana rasuah, beliau dibebaskan pada 2 Sept 2004 apabila Mahkamah Persekutuan, yang diketuai Hakim Tun Abdul Hamid Mohamad, yang kemudian menjadi Ketua Hakim Negara, mengubah sabitan kesalahan dan mengetepikan hukuman penjara terhadap Anwar bagi tuduhan meliwat Azizan dalam keputusan majoriti 2-1.

Abdul Hamid dan Hakim Tengku Baharudin Shah Tengku Mahmud membuat keputusan yang memihak kepada Anwar, manakala keputusan Hakim Datin Paduka Rahman Hussein pula adalah sebaliknya.

Bagaimanapun, Abdul Hamid, yang menulis penghakiman majoriti itu, berkata para hakim berkenaan mendapati Anwar dan tertuduh bersama, Sukma Darmawan Sasmitaat Madja, "terlibat dengan kegiatan homoseksual" dan oleh itu para hakim terdorong untuk mempercayai bahawa perbuatan liwat yang didakwa itu memang berlaku.

-- BERNAMA